

EEBBetarako aire zirkulazioa erabat gelditu da

Europatik hara zihoazen ehunka hegazkin
desbideratu edo itzularazi egin dituzte

Erredakzioa | DONOSTIA

EEBBetara zihoazen hegaldi guztiak bertan behera gelditu ziren atzo, Washington eta New Yorken izandako atentatuen ostean. Erasoak gertatu eta berehala itxi zituzten EEB-Betako 15.000 aireportuak, eta beste herrialdeetatik zihoazen eta airean zeuden hegazkinak desbideratu edo itzularazi egin zituzten. EEBBetako aire espazioa ezin izango da hegaldatu 24 orduz.

Kanadako aireportuak kolap-

satuta zeuden atzo, EEBBetara zihoazen 500 bat hegaldi hara desbideratu baitzituzten. Guztira Europatik irtendako 350 hegazkin inguruk atzera egin edota beste aireportu batean lur hartu behar izan zuten.

Kanadako agintariek atzo jakinarazi zuten hiri nagusietako aireportuetara iritsi ziren hegazkinak beste aireportu txikiagoetara bidaliko zituztela, hegazkinen pilaketa saihesteko. Kanadako Gobernuak itxi egin zituen aireportu guztiak atentatuak gertatu eta berehala, baina aire-



MATTHEW FERN / AP

Londresko Gatwick aireportuko American Airlines EEBBetako hegazkin konpainiaren bulegoa, itxita.

an zeuden eta EEBBetara zihoazen airekoak jasotzeko ireki zituzten geroago.

Europako aireportuetan bidaiari ilara handiak sortu ziren, atzerapenak nagusitu ziren, eta antolakuntza arazo ugari izan zituzten. Estatu Batuetako aireportuetan ere

antzeko arazoak izan ziren. Hegazkin konpainia gehienek atzo jakinarazi zuten, EEBBetara joatekoak ziren hegaldiak bertan behera geldituko dira gaur ere.

Erresuma Batuko Londresko aireportu nagusiak alerta egotzen zeuden atzo. Poliziak segur-

tasun neurriak areagotu zituen EEBBetako atentatuak gertatu ostean.

Erasoetan bi hegazkin galdu zituen United Airways EEBBetako konpainiak mundu osoan zehar hegaldatzen zituen airekoei lurra hartzeko agindua eman zien atzo.

NAZIOARTEKOA ALERTA EGOERAN



LEFTERIS PITRAKIS / AP

PALESTINARRAK

«EEBBek geuk pairatutakoa dastatu dezatela»

Libanoko errefuxiatu palestinarrek gustura hartu zituzten atzo EEBBetan izandako atentatuak. «Ehunka palestinar hil dituen Israelen politikarekin bat egin dute EEBBek eta geuk pairatutakoa dastatzeko garaia da», aldarrikatu zuten errefuxiatuek atzo.



SCHLAGER ROLAND / EPA

EUROPAKO GOBERNUAK
**EEBBetako enbaxaden
segurtasuna bermatuko
dutela agindu dute**

Europako hainbat herrialdeko gobernuak segurtasun neurri bereziak hartu zituzten atzo, EEBBen enbaxadak babesteko. Horrez gain, Israelen interesen segurtasuna ere bermatuko zutela agindu zuten hainbat herrialdek. Irudian, bandera beltza Austriako Legebiltzarrean, EEBBetako atentatuengatik.

EUROPAKO BATASUNA

**Atzerri ministroek bilkura
berezia egingo dute gaur**

Europako Batasuneko Atzerri ministroek bilkura berezia egingo dute gaur Bruselan, Estatu Batuetako atentatuen inguruan eztabaidatzeko. EBk Washingtoni zein laguntza eskain diezaikeen zehaztea izango da gaurko bileraren helburuetako bat. «Terrorismoaren aurreko elkarlanaren inguruan» ere mintzatuko dira Hamabostak.

ERASOEN BELDUR PORTUGALEN

**Bonba mehatxua izan da
EEBBek Oporton duten
enbaxadaren merkataritza
ordezkaritzan**

Bonba mehatxua jaso zuen atzo EEBBek Oporton duten enbaxadaren merkataritza ordezkaritzak, Portugalgo Poliziak aditzera eman zuenez. Washington eta New Yorken atentatuen ostean EEBBen aurka izandako lehen eraso mehatxua izan zen hura.

EKIMENAK ATZERATUTA

**Erresuma Batuko alderdi
kontserbadorearen bozen
emaitzak bihar arte ez
dituzte jakinaraziko**

Erresuma Batuko Alderdi Kontserbadoreak hauteskunde primarioak egin zituen atzo buruzagi berria hautatzeko, baina kontaketa bihar arte ez egitea erabaki zuen *tory*en buru William Haguek, EEBBetako atentatuen ondorioz.



VIRGINIA MAYO / AP

NATO

Bruselako egoitza nagusia hustu egin dute

NATOk ebakuatu egin zuen atzo Belgikako hiriburu Bruselan duen egoitza nagusia, eta Poliziak segurtasun neurriak areagotu zituen hiri guztian. Era berean, Atlantikoko Kontseiluaren bilkura deitzeko aukeraz eztabaidatu zuten NATOk buruek atzo.



AP

FRANTZIAREN PLANA
**Parisek indarrean jarri
du «terrorismoaren
aurkako plana»**

Frantziak «terrorismoaren aurkako plana» indarrean jartzea adostu zuen atzo lehen ministro Lionel Jospinek EEBBetako atentatuen ostean deitutako Gobernuaren premiazko bilkurren ostean. Plan horri jarraituta, Parisek segurtasuna areagotu du eraikin eta leku publiko jendetsuengatik eta mugetan.